

ԱԾԱՆՑՈՒՄԸ ՈՐՊԵՍ ԼԵԶԱՎԱԲԱՆԱԿԱՆ ՏԵՐՄԻՆՆԵՐԻ
ԿԱԶՄՈՒԹՅԱՆ ՄԻՋՈՑ «ՀԱՆԴԵՍ ԱՄՍՕՐԵԱՅՈՒՄ»
(1887-1900 թթ.)

Ածանցումը բառակազմական ամենակենսունակ եղանակն է¹: Կերջ-ածանցները իմաստային կապակցելիությամբ ավելի ընդգրկում են, քան նախածանցները, որոնք ոչ միայն քանակային տեսակետից են զիջում, այլև իմաստային. դրանք միայն բառակազմական նշանակություն ունեն², մինչդեռ վերջածանցները բառակազմական լինելով՝ հաճախ նաև խոսքիմասային ցուցիչ են³: Ածանցները կարող են իմաստային իրենց արտահայտությամբ փոխարինել արմատական բաղադրիչներով նկարագրությամբ⁴, ուստի ածանցման միջոցով կարճվում է արմատների բազմանդամությունը, հետևաբար նաև՝ կանխվում է տերմինի անբարեհնչությունն ու երկարաբանությունը: Արմատի փոխարեն ածանցի կիրառելիության փաստն այն է, որ հայերենում երկարմատ կազմությամբ ածանցավորներն ավելի շատ են⁵, այսինքն՝ երկարմատ բարդ բառերի բաղադրիչների հետագա ընդլայնումը հիմնականում կատարվել է ածանցման միջոցով:

Ածանցումը նկարագրելիս կանգ կառնենք ինչպես տերմինակերտման, այնպես էլ բառակապակցական տերմինների կազմում ոչ տերմինների կերտման դեպքերին, քանի որ վերջիններս ևս մասնակցում են կապակցության տերմինային իմաստի արտահայտմանը. «...բաղադրյալ տերմինի բաղադրիչներից յուրաքանչյուրը բնորոշում է առանձին հասկացություն..., իսկ տերմինն ամբողջությամբ՝ մի նոր հասկացություն⁶»:

Կանդրադառնա՞նք՝ ածանցների տերմինակազմական առանձնահատկություններին, ապա դրանց կիրառելիությանը, այսինքն՝ թե որ ածանցը

¹ Տես Լ. Հ. Դազանյան, Հայերեն լեզվաբանական տերմինների համակարգային-կառուցվածքային վերլուծություն, ԼՈՂ, IV, Երևան, 1977, էջ 282-283:

² Տես նույն տեղը, էջ 285:

³ Տես Ռ. Խ. Սկրտյան, Բարդ բառերի դասակարգումը և նրանց բաղադրիչների իմաստային փոխհարաբերությունը ժամանակակից հայերենում, ԼՈՂ, IV, Երևան, 1977, էջ 155:

⁴ Տես Ա. Սուրադյան, Հունարան դպրոցը և նրա դերը հայերենի քերականական տերմինաբանության ստեղծման գործում, Երևան, 1971, էջ 325:

⁵ Տես Ռ. Խ. Սկրտյան, նշվ. աշխ., էջ 157:

⁶ Տես Լ. Հ. Դազանյան, նշվ. աշխ., էջ 326:

* Տեսական մասը ներկայացնելիս նաև օգտվել ենք ժամանակակից բառակազմության ուսումնա-սիրություններից, հաշվի առնելով, որ բառակազմական օրինաչափությունները «զգալիորեն կայուն են» (Ա. Գ. Արախանյան, ժամանակակից հայերենի բառակազմական օրինաչափությունների զարգացման միտումները, ՊԲՀ, 3 (94), Երևան, 1981, էջ 32):

տերմինակազմությանը որքանով է մասնակից և բաղադրելիությանը, թե ինչ նախատիպերի է միանում: Ածանցումը կներկայացնենք ըստ նախածանց, վերջածանց և համածանց դիրքերի:

1. Ածանցների տերմինակազմական առանձնահատկությունները: «Տեսականորեն հայերենի բոլոր գոյականները կարող են ստանալ անժխտական նախածանցը⁷». *ան-* նախածանցը, ժխտելով նախածանցավոր կազմությունը, կարող է կրկնածանց գործածության մաս կազմել⁸. գրութան *անբաղադրյալ* (incoherent) գործողութեանց սկզբունք (1888,5,76): Այս կիրառության մեջ *բաղ-* նախածանցը միացել է մի արմատի, որը պարունակում է նրա «կից, միասին» նշանակությունները. դրանք *գոյգ-*ն անածանց ինքնին է արտահայտում, ուրեմն այս հարաբերության մեջ *բաղ-*ն օգտագործվել է որպես հավելյալ միջոց բառիմաստն ընդգծելու համար և ձեռք է բերել սաստկական նշանակություն:

Նախակից ձև (1891,2,44) բաղադրյալ տերմինում *նախ-* ածանցի նշանակությունը կարող է երկու կերպ ընկալվել. ա/ վերաբերում է սեռային տերմինատարրին, սակայն կցվել է տեսակային տերմինատարրին՝ և մջջնորդավորված է տեսակավորել սեռայինի իմաստը, բ/ ունի արմատական արժեք, բացատրվում է որպես *նախկինին կից*: Այս վերջին բացատրությունն ավելի հավանական է, քանի որ ունենք նաև *հնդեւրոպական նախաւոր լեզու* (1899,8,234) կազմությունը, որտեղ ևս հնարավոր է երկու բացատրություն. ա/ քանի որ չի կարող լինել անարմատ կազմություն, ապա *նախ-*ը ունի արմատական արժեք, նշանակում է *նախկին*, ածանցված՝ *նախկինավոր*, սրան իմաստային առնչություն ունի *նախնականը* (*նախնական այբբենարան* 1888,10,166), որը ևս, ինչպես *նախաւոր-*ը կազմված է ածականակերտ ածանցով, բ/ հնարավոր է առաջացած լինի բարդ տերմինի տարրալուծման հետևանքով: Հանդեսում կան *նախալեզու* (1887,10,146), *ընդհանուր նախալեզու* (1897,3,70), *հնդեւրոպական նախալեզու* (1898,5,145) տերմիններ: *Նախաւոր լեզու-*ն կարող է առաջացած լինել *նախալեզու* տերմինի տարրալուծման հետևանքով, երբ առաջին տերմինատարրը առանձնացվում է, դառնում ինքնուրույն գործածությամբ միավոր և ապա *-աւոր* ածականակերտ ածանցի միջոցով որպես տեսակ կապվում է սեռային տերմինատարրին: Բարդ տերմինը բառակապակցականի վերածելու այլ օրինակ. «Կրաւորականի եւ հասարակի դիմանշանք միաձեւ եւն...: Առաջինն, երբեմն միայն, ... յա յատկանշիով կը տարբերի երկրորդէն. այս վերջին պարագային կրաւորականը ներգործականի դիմակերտ նշաններն ալ կրնայ առնուլ» (1890,5,151): *Դիմանշան- դիմակերտ*

⁷ Ս. Ա. Գալստյան, Ան- ժխտական նախածանցով բաղադրությունները ժամանակակից հայերենում, ԼՀԳ, Երևան, 1973, N 5, էջ 75:

նշան անցումը կարող է նաև ածանցի միջոցով տեղի ունենալ. *դիմանշան-դիմային, դիմավոր նշան*.

Նախդիր տերմինը, ըստ ՆՅԲ-ի, գոյական է, ըստ ԼԲ-ի, «համանշանակ է նախադրություն տերմինին⁸», այսինքն համարժեք է իր՝ ածանցված տարբերակին: ՀԱ-ի օրինակներով՝ «անանջատ *նախդիրներն* պատ եւ պար» (1887, 11,163), «*նախադրութեանց* հոլովառութեանց անկանոնութիւնը» (1891, 12, 362): Սակայն ՀԱ-ն այս տերմինն ունի նաև դերբայական նշանակությամբ, երբ նախ- ածանցի նախատիպը բայն է, որը կապակցության մեջ դերբայական նշանակություն է ստանում. նախ-դիր որպես նախադրվող, սկզբից դրվող. «*նախդիր-դերանուն*» (1897,7,212), մակբայ լրացումով՝ «կերպախօսապես *նախդիր* լեզուներ» (1897,5,154), -ութիւն-ով բայանուն դարձած՝ «Ներգոյականն արեւելեան բարբառոյն մէջ ուն (ըմ, ամ) կը վերջաւորի, մինչ արեւմտեանը մէջ (Տ.Ս.- կը-ի) *նախադրութեամբ* կը բացատրէ...

(1890,2,42): ՀԱ-ն ունի նաև հոմանշային տարբերակ՝ «*յառաջադիր* բաղաձայն» (1896,8,228):
Հասարակօրէն լեզու (1888,10,171) բաղադրյալ տերմինում -*օրէն* մակբայակերտը ստացել է ածականակերտ արժեք, քանի որ նշված բաղադրյալ տերմինը գործածված է տերմինատարրի կրճատումով. պակասում է *գործածուած* բաղադրիչը, որ պահպանված է *հասարակօրէն գործածուած բառեր* (1898,4,100) տերմինում: *Ռամկօրէն գրութիւն* (1888,3,33) բաղադրյալ տերմինում, եթե *գրութիւն*-ը *գրել* բայից է բաղադրված, ապա տերմինատարրի կրճատում չկա. *ռամկօրէն գրել- ռամկօրէն գրութիւն*: -*Օրէն*-ը կարող է նաև մակբայակերտ նշանակությունը կորցնել՝ հանդես գալով փոխանունական կիրառություններում. *հին-հայ ռամկօրէն* (1900,1,19), *գուտ ռամկօրէն* (1889, 1,2), *գրաբարախառն ռամկօրէն* (1889,1,2), *գրաւոր ռամկօրէն* (1890,5,102):

Պայթուցիկ (explosives) (1899,10,290) տերմինի փոխարեն այժմ գործածվում է *պայթական*, քանի որ ժամանակակից հայերենում պատճառական բայի գրաբարյան հիմքը որպես -իկ ածանցի նախատիպ գործածական չէ, և ընդհանրապես նման ածանցման բայական նախատիպը սովորական չէ⁹: Այլ ածանցներ, որոնք միացել են գրաբարյան բաղադրյալ հիմքերին. ՆՅԲ՝ *աւելադրեմ- ՀԱ աւելադրական* գրեր (1896,3,76), ՆՅԲ՝ *բանաբար- ՀԱ բանաբարութիւն* (1891,4,102): Երբեմն ածանցները կազմում են նաև գրաբարին հատուկ բաղադրություններ. *եզական տառադարձութիւն* (1888,12,209), *երեքպատիկ ուղղագրութիւն* (1888,12,210), *աշխարհիկ լեզու* (աշխարհաբար) (1888,3,34), (*բառիմաստի*) *հնքնակագութիւն* (1896,3,77):

⁸ Լեզվաբանական բառարան, Երևան, 1975, էջ 227:

⁹ Տե՛ս Ս. Ս. Գալստյան, Ածանցումը և ածանցները ժամանակակից հայերենում, Երևան, 1978, էջ 134-138:

2. Նախածանցում: Նախածանցավոր նոր կազմությունները հանդեսում սակավաթիվ են: Գոյություն ունեցող մի քանի կաղապարների իրացումների հազվադեպ լինելը հնարավորություն չի տալիս որոշել դրանց դրսևորման օրինաչափությունները: Նկատելի է, որ նախածանցները տերմինների կազմությանը մասնակցում են գերազանցապես բառակապակցական տերմինների կազմում, ընդ որում կցվելով հիմնականում տերմինային բառերին՝ բուն տերմինակազմական շատ քիչ արժեք են դրսևորում. տար - տարականոն հոլովմունք (1899,5,148), համ- համագգի լեզուներ (1890,5,151)- համացեղ լեզուք (1890,5,151), նախ - տերմինի նախածանցման օրինակներ. նախատառ բաղաձայն (1899,7,207), նախաբնագիր (1891,10,289):

3. Վերջածանցում: Ինչպես նշեցինք, վերջածանցները զուգահեռ նաև խոսքիմասային ցուցիչներ են, և քանի որ «լեզվաբանական տերմինների գերակշռող մասը գոյականներ կամ գոյականաբար կիրառված ածականներ են¹⁰», իսկ բառակապակցական տերմիններում երկրորդական բաղադրիչները հատկանշային բնույթ ունեն, դրանց կազմությանը մասնակցում են գլխավորապես գոյականակերտ և ածականակերտ վերջածանցները:

Գոյականակերտ վերջածանցում: Հանդեսում գոյական տերմիններ են կերտվում հետևյալ վերջածանցներով -ութին, -ում, -իչ, -ուած: -Ութին ածանցի միջոցով հիմնականում արտահայտվում է կամ գոյական սեռային տերմինի վերացականություն, կամ ածական տեսակային տերմինի վերացականություն, այս դեպքում սեռ-տեսակ հարաբերությունը որոշչայինից փոխվում է հատկացայինի: Մյուս ածանցների միջոցով տերմինային գործողությունն առարկայանում է կազմվում են բայանուններ: Սրանց կազմությանը մասնակցում է նաև -ութին-ը:

Ածանցների նկարագրությունը շարադրում ենք ըստ նրանց կենսունակության նվազման:

«Լեզվաբանական տերմինների մեծ մասը բնորոշում է վերացական հասկացություններ, ուստի և այս տիպի տերմինների կազմությանը հայոց լեզվում ամենից ավելի հաճախակի մասնակցում է... -ություն վերջածանցը...»¹¹: Այս ածանցը միշտ էլ կենսունակ է եղել¹²: Հանդեսում այն տերմինակազմության ածանցային անենակենսունակ միջոցն է, իրացումների ընդհանուր քանակով գերազանցում է մյուս ածանցների կիրառություններին: -Ութին վերջածանցը առավելապես գործուն է բարդածանցավոր կառույց-

¹⁰ Լ. Յ. Ղազանյան, նշվ. աշխ., էջ 285:

¹¹ Տես նույն տեղը, էջ 286:

¹² Տես Ս. Յ. Մուրադյան, Բառագիտություն, Հայոց լեզվի պատմական քերականություն, հ. 2, Երևան, 1975, էջ 94:

ներում. Թաւերու շրջափոխութիւն (1899,10,293), (1890,2,43), ուղղագործութիւն (1888,5,87), բեւեռաքննութիւն (1887,2,21) և այլն: Զուտ ածանցավոր կառույցներում գործածվում է բացառապէս նախածանցների զուգահեռմամբ. բառի փոխարկութիւն (1895,8,231), համառօտութիւն (1889,8,159): -Ութիւն ածանցը բառակապակցական տերմիններում հաջորդ կենսունակ -ական ածանցի համեմատությամբ նվազ հաճախականություն ունի՝ պայմանավորված գոյականակերտ նշանակությամբ: Քանի որ բառակապակցական տերմինները գոյանում են, երբ հիմք-հասկացության որևէ հատկանիշ կամ հատկանիշներ գործածական անկախություն են ձեռք բերում, որոշչի կամ որոշիչների դերով, ածականակերտ -ական-ը այս հարաբերության մեջ ավելի ակտիվ դրսևորում է ունենում: -Ութիւնն այս դեպքում, ինչպես նշել ենք, տեսակային տերմինատարին կարող է վերացականություն հաղորդել. (լեզվի) կցողութիւն (1897, 5,154), արտասանութեան պէսպիսութիւնք (varietes) (1888,9,153), բաղաձայնի հնչականութիւն (somorite) (1899,10,290) և այլն:

Խոսքիմասային նշանակությամբ, ըստ Ս. Ա. Գալստյանի, այս ածանցը բաղադրություններ է կազմում AR1, NR1, VR1 (A ածական, N գոյական, V բայ, R1 գոյականական ածանց¹³) կաղապարներում¹⁴: Հանդեսում այս կաղապարների հերթականությունը ըստ դրսևորման հաճախականությամբ հետևալն է. AR1, VR1, NR1: Առաջին կաղապարի կրկնածանց տիպի կենսունակության պատճառը վերևում ակնարկեցինք. -ութիւն ածանցը հանդեսում հաճախ կրկնածանց է կազմում ածականակերտ ածանցների հետ՝ վերացականություն հաղորդելով դրանցով կազմված բաղադրություններին: Նախատիպը ածանցավոր ածականն է. անջատականութիւն (1897,3,72), շէշտաւորութեան եղանակ (1896,8,228), հոլովականութիւն (1896,10,293), եղանակաւորութիւն (modification) (1896,6, 166), լեզուին գործարանաւորութիւն (1896,8,229), ձայնաւորի սաստկութիւն (1896,8,227), լեղականութիւն (version) (1896,10,293) և այլն: -Ութիւն վերջածանցը նախորդ տեսակի համեմատ նվազ հաճախադեպությամբ միանում է նաև անածանց հիմքերին: Նախատիպն է՝ ա/արմատական ածականը. բառի կարճութիւն (1887,12,188), օտարութիւն (օտարաբանություն) (1891,12,359), բ/բարդ ածականը. բայերու ձեւաշատութիւն (1898,10-11,297), քաջահնչութիւն (1900,3,70), խոնարհման կանոնաց գարտուղութիւն (1891,3,82): VR1 կաղապարի կենսունակությանը նպաստող հանգամանք է «գրել», «փոխել», «խօսել» բայերի վերջնարմատ հաճախ

¹³ Ս. Ա. Գալստյանի կիրառած պայմանական նշաններն օգտագործել ենք նույնությամբ., բանաձևերի մասին տես նշվ. աշխ., էջ 33:

¹⁴ Տես նույն տեղը էջ 167: Հետագա դասակարգման ընթացքում նաև նկատի է առնված նշված աշխատության մեջ կիրառված դասակարգման օրինակը:

հանդիպող դիրքը. քանդակագրութիւն (1898,5,137), սխալագրութիւն (1891,8,229), տառագրութիւն (1889,2,26), չիրմագրութիւն (1898,8-9,238), կնքագրութիւն (1898,8-9,239), վիմագրութիւն (1893,3,88), նմանագրութիւն (par assimilation) (1895,12,371), տառափոխութիւն (metathesis) (1894,5,157), ծայնափոխութիւն (1891,2,44), կերպախօսութիւն morphologie (1896,2,47), հազագախօսութիւն (1899,10,289), նաև անուանադութիւն (1888,5,77), բայից կազմակերտութիւն (1887,2,23), բանաբաղդութիւն (1891,4,102), բազմահամադրութիւն (polysynthesisme) (1896,5,151) և այլն: Նշված օրինակներում որպէս նախատիպեր հանդես են գալիս բայական բառակապակցությունները, որոնք և առավելապես բնորոշ են այս կաղապարի իրացումներին: Բայարմատ-նախատիպը հանդես է գալիս մեկ օրինակի հազվադէպությամբ. բառի խնայութիւն (1887,12,188): NR1 կաղապարը չունի նախորդների տարածվածությունը: Պրա կենսունակությունը ևս կախում ունի գործածական բաղադրիչի առկայությունից. ծայն (ծայնավոր, հնչյուն) տերմինը, ունենալով հաճախակի կիրառություն, կարող է բաղադրության կազմում ածանցվելով վերացականություն արտահայտել. նմանածայնութիւն (1896,8,228), աղօտածայնութիւն (1899,10,292), խառնածայնութիւն (1888,7,119): Նշված օրինակներում բաղադրության նախատիպը բարդ գոյականն է: Սա օրինաչափ է նաև մյուս կիրառությունների դեպքում. օտարածելութիւն (1898,4,98), հազագաբանութիւն (1899,10, 289), լեզուի միակերպութիւն (1887,9,133), յատկաբանութիւն (terminologie), վերնագրութիւն (1891,7,197) և այլն:

Մյուս վերջածանցները տերմինակազմությանը մասնակցում են պասիվ կերպով: Պրանք ներկայացնող կաղապարների իրացումների քանակը փոքր է:

«-Ում ածանցը գործում է VR1 կաղապարում¹⁵», քանի որ բայանուն կազմող ամենակենսունակ ածանցն է: Հանդեսում որպէս նախատիպեր դրվում են հիմնականում անցյալի հիմքերը. նոյնացում (assimilation) (1896,4,114), ծայնաւորներու հաւասարացում (1894,3,էջ84), ծայնաւորի տկարացում (1896, 8,227), հնչիւններու ստուարացում (1888,6,102) և այլն: Նախատիպերը կարող են լինել պարզ, ածանցավոր ու բարդ. հնչիւնի պայթում (explosion) (1899, 10,290), տառից յեղաւորում (1896,3,75), բառաբաժանում (1898,5,135) և այլն::

-Իչ վերջածանցը և գոյականակերտ է, և՛ ածականակերտ, հանդեսում տերմինակազմությանը մասնակցում է նշված զույգ գործառնությով: Նախ գոյականակերտման մասին: Կաղապարն է VR1¹⁶: Այս կաղապարի համար որպէս նախատիպեր դրվում են պատճառական բայերի գրաբարյան հիմքերը. ծայնական ծանուցիչ (1896,10,292) ծայնական ամբողջացուցիչ (1898,8-9,228):

¹⁵ Ս. Ա. Գալստյան, նշվ. աշխ., էջ 178:

¹⁶ Տե՛ս նույն տեղը, էջ 139:

Որպես նախատիպ կարող է դրվել նաև ներգործական բայահիմքը. նույնութեան (identite) նշանակիչ (1898,12,378):

- Ուած վերջածանցով. VR1- տառական յօրինում (1887,2,22): -Ված վերջածանցը ժամանակակից հայերենում գործածվում է որպես ածականակերտ, գոյականակերտ գործառույթ ունի –վածք վերջածանցը¹⁷, այս վերջինիս է համարժեք հանդեսի –ուած-ը:

Ածականակերտ վերջածանցում: Հանդեսում տերմինակազմությանը մասնակցում են -ական, -ային, -աւոր, -ացի, -եան, -ող, -ոտի, -իչ, -իկ, -պատիկ, -ուկ, -ուն, -գոյն ածականակերտ ածանցները: Պետք է նկատի ունենալ, որ դրանք իրենց բուն ածականակերտ նշանակությամբ գերազանցապես գործածվում են բառակապակցական տերմիններում տեսակավորելով ու կոնկրետացնելով գոյականով արտահայտված հիմք-հասկացությունը: Ընդհանրապես ածականակերտ ածանցների կախյալ բաղադրիչի դերով գործածությունը օրինաչափ է, դրանցով կազմված տերմինատարրերը առանձին կարող են գործածվել փոխանունաբար՝ ստանալով գոյականի արժեք¹⁸:

Ներկայացվելիք բառակապակցական տերմինները, ինչպես և ներկայացվածները, մեր տվյալներով նորակազմ են, հետևաբար դրանց տերմինատարրերի սեռատեսակային հարաբերությունը ևս նոր է, ու քանի որ հիմնականում ածականակերտ ածանցման միջոցով է արտահայտվում տեսակի հատկանշային կապը հիմք-հասկացության հետ, ուրեմն նորակազմ բառակապակցական տերմինների ներսում ածանցումը պետք է համարել տերմինակազմությանը մասնակից միջոց, բացառությամբ այն դեպքերի, երբ ածանցված պատրաստի կաղապարը վերափնաստավորված կիրառությամբ է տեսակավորում հասկացությունը. օրինակ առեռակ բայ (1896,5,150), մերձաւոր լեզուներ (1897,3,69):

«Ածականական կազմությունների մեջ ամենակենսունակ և կանոնավորապես հանդիպողը -ական վերջածանցով կերտված տերմիններն են: Սա (բառ կամ բառի մի բաղադրիչ + ական վերջածանց) փաստորեն, «ածական-տերմինների» ամենա-բնորոշ և տարածված մասնավոր կաղապարն է...¹⁹»: Ինչպես -ութիւն-ը, -ական վերջածանցը ևս ակտիվությամբ կայուն է եղել ու կա լեզվի երեք փուլերում²⁰: Հան-դեսում գործածության հաճախականությամբ այս ածանցը զիջում է միայն գո-յականակերտ –ութիւն ածանցին: «- Ական ածանցը խիստ գործուն է NR2 և VR2 կաղապարներում²¹» (R2- ածականական ածանց):

¹⁷ Տե՛ս նույն տեղը, էջ 164-165:

¹⁸ Տե՛ս նույն տեղը, էջ 290:

¹⁹ Լ. Հ. Ղազանչյան, նշվ. աշխ., էջ 290-291:

²⁰ Տե՛ս Ս. Հ. Մուրադյան, նշվ. աշխ., էջ 93:

²¹ Ս. Ա. Գալստյան, նշվ. աշխ., էջ 65:

Հանդեսում առավել գործուն է NR2 կաղապարը: Այս կաղապարում նախատիպերը գոյականական են կազմության բոլոր դրսևորումներով. պարզ, ածանցավոր և բարդ. ա/ գործածական ակտիվություն են ցուցաբերում պարզ գոյական նախատիպ ունեցող տերմինները. կառավական ծայն (1897,5,154), ճչական (*Affricata*) ծայն (1900,1,14), ծայնական ոչնչացում (1896,3,76), մասնական լեզուներ (1897,7,213), բառական թարգմանություն (1899,1,19), բառական-գիր (1897,5,154), տառական երևույթ (1896,6,182) օրենք (1890,5,101) և այլն, բ/ Համեմատաբար սակավ դրսևորում ունեն ածանցավոր գոյական նախատիպ ունեցող տերմինները. յաւելուածական մասնիկով լեզուներ (1896,3,76), վայրկենական գրեր (1900,1,14), գրչական փոխառություն (1899,1,17), գ/ Սակավաթիվ են նաև բարդ գոյական նախատիպ ունեցող տերմինները. լեզուաց ազգաբանական խնամություն (1897,3,69), լեզուաց ցեղաբանական դասակարգություն (1896,2,47), բնագրաբնական խորհրդածություն (1891,6,169), բազմասեռական (շատ նախալեզուներ ընդունող) լեզուագետներ (1896,6,165): Հանդեսում VR2 և AR2 կաղապարները նախորդի համեմատ քիչ գործուն են և ունեն գրեթե նույնաքանակ իրացումներ: VR2 -ը հիմնականում ունի բայական բառակապակցություններով նախատիպեր. լեզուաց ճիւղագրական տախտակ, ծառ (1897,3,69), աւելադրական գրեր (1896,3,76), լեզուաց կերպախօսական կազմություն (1896,6,166), ծեւերու յառաջագայական (*genesiaque*) զարգացում (1896,8,229) և այլն: VR2 -ը մեկ օրինակի հազվադեպությամբ ունի նաև բայարմատ-նախատիպ. շրջական տառ (1897,7,214), փոխանունական կիրառություն. թաւ շրջականներ (1897,7,214): AR2 կաղապարի նախատիպերը հիմնականում ածանցավոր ածականներ են. արմատի կցողական աստիճան (1896,3,76), տառերու փակողական (*occlusif*) յատկություն (1899,10,293), անջատողական (*isolant*) լեզուներ (1896,թիւ3,էջ76), լեզուներու յօրինուածական խումբեր (1896,1,2), սաստկական (*emphatique*) հնչիւն (1899,10,291), զրաւորական մբերք (1888,7,121) և այլն, նաև պարզ ածական պարզական արմատ (1899,7,203):

VR2 կաղապարում -իչ ածանցը կազմում է ածականներ²²: Ինչպես գոյականական, այնպես էլ այս կաղապարի համար որպես նախատիպեր հիմնականում դրվում են պատճառական բայերի զրաբարյան հիմքերը. սաստկացուցիչ արմատ (1896,10,292), սաստկացուցիչ բայ (1896,5,150), (արմատի) մածուցիչ աստիճան (1896,3,76), զօրացուցիչ ծայն (1899,7,205) և այլն: Այս կաղապարում որպես նախատիպ կարող են դրվել նաև ներգործական

²² Տե՛ս նույն տեղը, էջ 139:

բայափիմքերը. միաւորիչ (incorporante) լեզուներ (1896,5,151), կազմիչ տարր (1896,5,150), օժանդակիչ նախդիր (1887,11,163):

-Աւոր ածանցով կազմութիւնները քիչ են. NR2- գործարանաւոր լեզուներ (1896,3,76), արուեստաւոր մատենագրական լեզու (1898,10-11,312), VR2 - կրկնաւոր բառեր (1899,7,202): Փոխանունական կիրառություն. «...ինչու» միայն վրա բառն է որ կը տուժէ, եւ միւս յ-աւորներն ազատ են իրենց / ին պահելու...» (1889,1,9):

« -Յան ածանցը խիստ գործուն է NR2 կաղապարում...²³»: Հանդեսում միայն նշված գոյականական նախատիպով կաղապարն է գործում. միարմատեան անուն (1894,7,211), եռարմատեան բայեր (1896,10,292), երեքլեզուեան բառարան (1889,5,85), չորեքկերպեան յարմարագրութիւն (1888,5,75), չորեքկէտեան (կետադրական նշան) (1898,5,138), միջինմետրոպեան տառեր (1897,3,68), ժողովրդեան բարբառ (1899,10,295): Փոխանունական կիրառություն. երեքդիմեաններ (1898,12,378):

-Ող ածանցը դրվում է բայափիմքերի վրա, նախատիպերը կարող են լինել, ինչպես ներկայի, այնպես էլ՝ կատարյալի հիմքերը. հնչող գրեր (1900,1,15), (արմատի) յարող աստիճան (1896,3,76), թանձրացնող նշան (1889,1,9):

-ԻԿ, ուկ, -ուն, -ային, -ոտի, -ացի, -պատիկ վերջածանցները հանդեսում տերմինակազմությանը մասնակցում են մեկական օրինակներով. VR2- պայթուցիկ գիր (1900,1,13), փոխանունական կիրառությամբ. միջին պայթուցիկներ, լերկ պայթուցիկներ (1900,1,13), թվական նախատիպով երեքատիկ ուղղագրութիւն (1888,12,210), VR2- նորելուկ բառ (1895,12,359), VR2- դողդողուն տառեր (1894,1,28), NR2- պարզ հազագային (spirante) տառեր (1899,10,293), AR2- օտարոտի կազմակերպութիւն (1888,3,35), AR2- գաւառագի լեզու (1888,7,121):

-Գոյն վերջածանցի գերադրական նշանակությունը և քերականական է, և բառակազմական, հետևաբար այն քերականական-բառակազմական ածանց է²⁴: թանձրագոյն հնչիւն (1888,12,210), թուլագոյն գիր (1888,12,210), տկարագոյն ձայնաւոր (1894,5,156), խստագոյն հնչում (1888,12,209), աղօտագոյն ձայնաւոր (1894,5,156) և այլն:

Միայն քերականական նշանակություն ունեն վերջավորությունները, որոնք կազմում են բառածներ²⁵: Հանդեսում նոր բառածն է գոյանում

²³ Նույն տեղը, էջ 146:

²⁴ Տե՛ս Ս. Էդյան, Ածանցները ժամանակակից հայերենում, Երևան, 1963, էջ 140-141:

²⁵ Ըստ Ա. Ս. Սուքիասյանի դասակարգման, բաղադրյալ բառերի տեսակ են վերջավորություններով կազմված բառածները. տե՛ս ժամանակակից հայոց լեզու, Երևան, 1989, էջ 265:

անվանական տերմինի բայական գործածության դեպքում. «...հայերեն լեզուն ունի եւ կամ մեծ յարմարութեամբ կարող է բառոյն համապատասխան բառեր...» (1889,1,7), «տողելով... կը գրէ» (1891,7,198), բառախմբեր տողել (1894,5,155):

4. Համաժանցում: Համաժանցավոր կաղապարները հանդեսուն շատ են, քիչ են դրանց իրացումները, հիմնականում սահմանափակված են մեկերկու օրինակներով: Նախաժանցները, ինչպես ցույց տվեցինք, քիչ են հանդիպում մեկ ածանցով կազմություններում, այլ ածանցների հետ ակտիվ են զուգորդվում, ըստ այդմ առավելապես դրսևորվում են համաժանցավոր կազմություններում: Զուգահեռ ածանցի առկայությունը վերջաժանցումը ոչ սահմանափակում է, ոչ ակտիվացնում. վերջաժանցների գործածության սահմանը, ինչպես առանձին կիրառությունների դեպքում, որոշում է ածանցի կենսունակության աստիճանը:

Հանդեսուն համաժանցավոր կազմությունները ներկայացնում ենք զուգորդման հիմք ընդունելով համեմատաբար կայուն դրսևորում ունեցող ածանցները. ան-, առ-, տար-, համ-, փոխ-, բաղ-, ամենա- + -ութիւն = անմնամաձայնութիւն (dissimilation) (1900,3,69), աղդթերադրութիւն (juxtaposition) (1896,3,77), տարածայնութիւն (dissimilation) (1894,1,29), համաձայնութիւն (assimilation) (1894,1,29), փոխազրութիւն (1898,10-11,312), բաղազրութիւն (1888,12,221), ամենախօսութիւն (pasilalie) (1887,12,187) և այլն:

ան-, համ-, յար- + -ական = անփոփոխական նշանակալից ծայններ (1896,3,76), անհնչական տառ (1893,3,84), անբերական նախադասութիւն (1888,12,215), համաշխարհական լեզու (1896,1,2), համաձայնական (syntaxique) ձեւեր (1898,3,79), աղաբերական գրեր (1896,3,76), փոխանունական կիրառություն. «...բառերն ընտրութեամբ առնուած են եւ անգործածականները մերժուած են...» (1890,9,218) և այլն:

տար-, համ-, արտ- + -ում = տարածայնում (1894,5,157), համաձայնում (assimilation) (1894,5,157), աղտահնյում (1899,10,291) և այլն:

ան- + -աւոր, -արան = անգրաւոր (1888,9,153), անյօղաւոր նշանակալից ծայններ (1896,3,76), բաղաձայն-ներուն անձայնաւոր շարք (1887,2,21), անգործարան լեզուներ (1896,3,76) և այլն:

Հազվադեպ իրացումներ ունեն. նախ + իկ, աւոր = նախամասնիկ (1893,11,339), հնդեւրոպական նախաւոր լեզու (1899,8,234), չ + ող = չինչող գրեր (1900,1,15), ներ + իկ = ներդարծիկ տառ (1897,7,214):

Նշված օրինակներում տերմինակազմական նորությունը հիմնականում արտահայտված է նախաժանցման միջոցով. մասնիկ- նախամասնիկ, հնչական տառ- անհնչական տառ, զրութիւն- բաղազրութիւն: Նախաժանց-

ման և վերջածանցման միաժամանակյա նորության դեպքում աննախածանց նախատիպը կամ անվերջածանց նախատիպը առանձին չեն գործածվում. ինչպես (ան)գործարան լեզուներ- անգործ(արան) լեզուներ, ներդարծ(իկ) տառ- (ներ)դարծիկ տառ: Տերմինակազմական նորություն է արտահայտում վերջածանցումը, եթե՝ գոյականական վերջածանցը ածականականով փոխելու միջոցով համածանցավոր գոյականը տեսականին կիրառություն է ստանում. համածայնութիւն- համածայնական ծեւեր:

ՀԱՍԱՌՈՂՏԱԳՐՈՒԹՅՈՒՆՆԵՐ

ԼՈՅ- Լեզվի և ոճի հարցեր:

ՀԱ- Հանդես ամսօրեա

ԼՀԳ- Լրաբեր հասարակական գիտությունների:

ԼԲ- Լեզվաբանական բառարան, Երևան, 1975:

ՆՀԲ- Նոր քառգիրք հայկազեան լեզուի, հ. 1, Երևան, 1979, հ. 2, Երևան, 1981:

ՊԲՀ- Պատմա- բանասիրական հանդես: